

GASA ETA ENERGIA ITURRI BERRIZTAGARRIAK DIRA JAURLARITZAREN APUSTU ESTRATEGIKOAK

Energia berrigarrien erabilera bikoiztu egingo du EEEk

■ Energiaren Euskal Erakundeak (EEE) 64.000 milioi pezeta jarriko ditu horretarako 2005a arte

■ Energia eolikoaren bidez, 140.000 etxebizitzak behar adina argindar ekoitziko da EAEn sei urte barru

■ Bizkaiko Badia proiektuetarako 75.000 milioi pezeta inbertituko dira aurtan

Joseba Aiartza / Bilbo

ENERGIA ITURRI berriztagarrien erabilpenari bultzada eman nahi dio Energiaren Euskal Erakundeak (EEE, Eusko Jaurlaritzako energi sozietatea). Energia iturri garbiok —hidraulikoa, eolika eta biomasa— eta, batez ere, gas naturala, EEEren estrategia energetikoaren ardatz nagusiak dira datozen urteetarako.

Josu Jon Imaz Industria sailburu eta EEEko lehendakariak atzo azaldu zuenez, 2005. urtera arte guztira 64.000 milioi pezeta inbertituko dira energi iturri berriztagarriak garatu eta haien ekoizpena bikoizteko.

Iturri horien artean, energia eolikoak izango du lehen-tasuna. Horren bidez soilik, Imazek aurreratu du sei urte barru posible izango dela EAEko 140.000 etxebizitzak behar duten argindar guztia ekoiztea, hau da, Bilboko etxebizitza guztiek edo Gipuzkoako %60k behar duten argindarra.

Aurtan bertan 5.000 milioi pezeta inguru inbertituko dira halako energietan. Inbertsioak Elgeako parke eolikoan, Araiako minizentral hidraulikoan eta Gipuzkoako biogas instalazioetan egingo dira neurri handi batean.

Gas naturalari dagokionez, Imazek gogoratu du Bizkaiko



XOUSE SIMAL

Josu Jon Imaz Industria sailburua, Javier Aranburu sailburuordea eta Jesus Maria Goiri EEEko zuzendaria.

Badia proiektuetarako (birgasifikazio planta eta ziklo konbinatuko argindar planta) beste 75.000 milioi pezeta jarriko dituela proiektuen eragileek, hots EEEk, Repsolek, Iberdrolak eta BP-Amocok.

Bestalde, Imazek ontzat jo ditu EEEren emaitzak, Jaurlaritzaren helburu energetikoen ildotik baitoaz. Helburu horien artean, intentsitate energetikoa kontrolatzea, menpekotasuna gutxitzea, ingurugiroa zaintzea eta hornikuntza hobetzea azpimarratu ditu.

Autohornikuntza energetikoa %5 ingurukoa da oraindik EAEn

■ EAEko energi eskaria 5.660 kptb-ekoa izan zen iaz (ptb petrolio tonaren baliokidea da), aurreko urtean baino %11 gehiago eta inoiz baino altuagoa. Petrolioaren deribatuen eskaria %14 gehitu zen, gas naturalarena %12 eta argindarrarena %6. Kontsumoa, berriz, %9 gehitu zen, ekonomi sektore guztietan nahiz etxebizitzetan. Lehen mailako energi ekoizpena

300 kptb-ekoa izan zen. Horrek esan nahi du EAEn ekoiztutako energia kontsumoaren %5 ingurukoa dela. Autohornikuntza jaitsi egin da azken urteotan, neurri handi batean Gaviota eta Albatros gas sorguneak agortu direlako. Jaurlaritzaren estrategia energetikoaren helburua 2005erako autohornikuntza lortzea da, hain zuzen ere.

EEE taldeak 2.123 milioi pezeta irabazi zituen iaz, %9 gehiago

■ EEE taldeak 2.123 milioi pezeta irabazi zituen 1998ko ekitaldian, aurrekoan baino %9 gehiago. Emaitza horren eragile nagusiak taldeko gas sozietateak izan dira, hots, Euskadiko Gas sozietatea, Gasnalsa eta Bilbogas. Gaur egun EAEko herritarren %93k gas naturala eskura dezaketela azpimarratu dute EEEko ardura-dunek. Taldearen onda-

rearen balioa 38.127 milioi pezetara heldu zen (%5 gehiago), eta iaz egindako inbertsioak 4.366 milioi pezetara iritsi ziren (%23 gehiago). EEEk nabarmendu duenez, iazkoa bigarren urtea izan zen sozietateak bere jardura finantzatzeko Industria Sailaren diru laguntzarik eskuratu behar izan ez zuena, berezko baliabideak erabili baitzuten.

Iberdrolak 57.567 milioi irabazi ditu lehen seihilekoan, %5,8 gehiago

■ 43.000 milioiko hornidura egin du atzerriko negozioaren finantza egitura sendotzeko

J. Aiartza / Bilbo

IBERDROLA argindar konpainiak 57.567 milioi pezeta irabazi ditu aurtengo lehenengo seihilekoan (345,98 milioi euro), aurreko ekitaldiko epe berean baino %5,8 gehiago, enpresak atzo jakinarazi zuenez.

Enpresa elektrikoaren emaitzak oso ezberdinak izan dira lehenengo hiriuhilekoan (etekin %4,1eko jaitziera) eta bigarrenean (%23ko hazkundea).

Iberdrolak %7,7 gutxitu du argindar ekoizpena ekaina arte. Ekoizpen hidraulikoa %62,2 jaitsi da, euri eskasaren ondorioz. Ekoizpen nuklearra, berriz, %11,3 gutxitu da, zentral nuklearren etenaldiek eraginda.

Jaitziera horiek berdintzeko, Iberdrolak %658,7 biderkatu behar izan du argindar produkzio termikoa, Horri esker, Espainiako argindar guztia %29,5 ekoitzi du.

Konpainiaren fakturazioa %7,8 gehitu da urte erdi honetan, bai etxebizitzetan (%7,8 gehiago) eta baita, batez ere, industriarloan (%9,3).

Gainbalioak partaidetzak saltzeagatik

Taldearen gastuak %4,4 gutxitu dira ekaina arte, eta finantza kostuak %17,3. Aldi berean, nazioarteko negozioen emaitzak 4.767 milioi pezetara heldu dira, eta dibertsifikazio negozioenak 5.326 milioi-tara (%57 gehiago).

Iberdrolak 36.354 milioiren gainbalioak lortu ditu Red Electrica de España sozietatean eta Soto de Ribera zentral termikoan zituen partaidetzak salduz.

Salmenta horiei esker, Bilboko enpresak 42.883 milioi pezetako hornidura egin duela adierazi du, eta hori atzerriko negozioaren finantza egitura sendotzeko eta kostuen berregituraketa programa azkartzeko erabiliko duela.

Datu nagusiak		
Herrialdeak	Energia eskaria	Hazkundea
EAE	5.660 Kptb*	+%11
Gipuzkoa	1.677 Kptb	+%11
Bizkaia	3.185 Kptb	+%12
Araba	799 Kptb	+%8
Sektoreak	Energia kontsumoa	Hazkundea
Industria	2.127 Kptb	+%9
Garraioa	1.077 Kptb	+%8
Zerbi.+etxebiz.	808 Kptb	+%12
Guztira	4.197 Kptb	+%9

* p.t.b: (pretolio tonaren baliokideak)